

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. 18मीं लोकसभा दा पैहला सत्र अज्जै थमां शुरू होआ'रदा ऐ। शुरू च नमें चुनोए दे सांसदें गी सगंध चकाई जाग।
2. उपराज्यपाल मनोज सिन्हा होरें आखेआ जे जम्मू कश्मीर च आतंकवाद अपने खीरी साह लै करदा ऐ ते हाल च होए दे आतंकी हमले दुश्मन दी परेशानी ते बोखलाहट दा सबूत न।
3. पुलस महानिदेशक आर.आर.स्वैन होरें आखेआ ऐ जे पाकिस्तानी आतंकवादिएं गी मदाद ते समर्थन देने आलें खलाफ "Enemy Agents Act" लागू कीता जाग।
4. राई-बाई दे पूरे पराते विकास सरबंधी एचएडीपी कार्यक्रम जम्मू कश्मीर च कृषि क्षेत्र च बड्डा बदलाव आन्नने च कारी दा साबत होआ'रदा ऐ-आखेआ मनोज सिन्हा होरें।

<><><><><><>

Parliament Session

18मीं लोकसभा दा पैहला इजलास अज्जै थमां शुरू होआ'रदा ऐ। इस दरान नमें चुनोए दे सांसदें गी सगंध दोआई जाग। वरिष्ठ बीजेपी सांसद भर्तृहरि महताब होरें गी अस्थाई अध्यक्ष बनाया गेआ ऐ, ओह नमें चुनोए दे सांसदें गी सगंध दोआंगन। लोकसभा स्पीकर दा चुनां बुधवारें होग जिसलै कि राष्ट्रपति द्रौपदी मुर्मू होर वीरवारें संसद दे दौनें सदनें सांझे तौर पर संबोधत करगंन। राज्यसभा दा इजलास वीरवारें थमां शुरू होग। संसद दा एह इजलास अगले म्हीने दी त्रै तरीक गी मुक्की जाग।

<><><><><><>

LG-Terrorism

उपराज्यपाल मनोज सिन्हा होरें आखेआ ऐ जे आतंकवाद एल्ले अपने खीरी साह लै करदा ऐ जेहदे करी साढा गोआंढी मुल्ख, जेहड़ा आतंकवाद दा सब्बने शा बड्डा निर्यातक ऐ, ओह परेशान ऐ। उनें आखेआ जे हाल च पेश आई दियां अतंकी घटना दुश्मन दी बोखलाहट गी दर्शादियां न ते कन्नै उनें चेले-चांटे दी बी जेहड़े

उनेंगी आसरमा ते जरूरी साजोसमेयान उपलब्ध कराइयै मदद करदे न। उपराज्यपाल होरें आखेआ जे असेंगी आतंकवादिएं ते उंदे सैहयोगिएं दा तुप्पी—तुप्पियै खात्मा करना ऐ। ओह कल रियासी दे तलवारा स्थित जम्मू कश्मीर पुलसै दे सिखलाई केन्द्र च 16में बीआरटीसी बैच दी पासिंग आउट परेड समारोह दरान बोला'रदे हे। बार्डर बटालियन दे 860 नमें भर्ती कीते गेदे कांस्टेबलें अपनी सिखलाई कल मुकम्मल कीती। अपने संबोधने च उपराज्यपाल होरें नमें कैडटें गी ट्रेनिंग पूरी करने ते जम्मू कश्मीर पुलस दा हिस्सा बनने पर ममारकबाद दिक्ती। उनें आखेआ जे रियासी दा एह सब्सिडरी ट्रेनिंग सेंटर इक प्रमुख सिखलाई केन्द्र ऐ, जित्थें रंगरूटें गी सिखलाई देने दे कन्नोकन्नी पुलसै दिएं जिम्मेवारिएं, मुल्यें—कट्रें ते तौर तरीके कन्नै बी वाकफ करांदा ऐ जेहडे कनून बवस्था गी बनाई रखने ते आतंकवाद जनेइएं चुनौतिएं दा पूरी कामयाबी कन्नै मकाबला करना सिक्खी जंदे न। उनें मेद कीती जे सिखलाई पूरी करियै हुन अपनी ड्यूटी सांभने आले एह रंगरूट पूरी निष्ठा, समर्पणभाव ते संजीदगी कन्नै अपनी जिम्मेवारी गी अंजाम देंगन ते जम्मू कश्मीर पुलस दिएं उच्च ते सगगोसार परम्पराएं गी अगगे लेई जांगन।

<><><><><><>

DGP-Terror

पुलस महानिदेशक आर.आर.स्वैन होरें आखेआ ऐ जे पुलसै आतंकवादिएं दे समर्थकें खलाफ सख्त कारवाई जकीनी बनाने लेई एनिमी एजेंटस कनून जां अध्यादेश आनने दी सिफारश कीती ऐ जेहड़ा गैर कनूनी गतिविधिएं पर रोक सरबन्धी यूएपीए कनून कोला मता सख्त ऐ जेहदे च घट्टोघट्ट सजा उमरकैद ऐ। डीजीपी होरें घोषणा कीती जे कटुआ जिले दे हीरानगर च होए दा आतंकी हमला जेहदे च दऊं पाकिस्तानी आतंकवादी मारे गे हे ते सीआरपीएफ दा इक जवान शहीद होई गेआ हा, इस मामले गी प्रदेश जांच अजेंसी एसआईए गी सौंपी दिक्ता गेदा ऐ ते इस मामले च अजें तोड़ी 6 लोकें गी गिरफ्तार बी करी लैता गेदा ऐ। डीजीपी स्वैन होरें एह गल्ल कल जम्मू शैहरा दे बाहरले बाग—ए—बाहू इलाके च कल संजा चिरे साइबर पुलस स्टेशन दा उदघाटन करने दे परैत पत्रकारें कन्नै गल्लबात करदे होई आक्खी। उनें आखेआ जे एनिमी एजेंटस एक्ट जां अध्यादेश विदेशिएं चेचा करियै पाकिस्तानी हमलावरें खलाफ बनाया गेदा ऐ जेहडे ओ इत्थें हमला करियै हालात खराब करने, अस्थिरता पैदा करना, कनून ते संविधान तैहत चुनी गेदी सरकार खलाफ अपनी विचारधारा फैलाने जां थोपने दी मंशा कन्नै औंदे न। उनें आखेआ जे इस कनून तैहत गिरफ्तार कीते गेदे लोकें दे मकददमें लेई विशेष अदालतां खडेरियां जांगन।

<><><><><><>

Floods Home Minister

गृहमंत्री अमित शाह होरें हाड़ें दे बेहतर प्रबंधन आस्तै नदिएं दे जलस्तर दे पूर्वानुमान आली प्रणाली गी होर बेहतर ते उन्नत बनाने दे निर्देश दिक्ते। हाड़ें दे प्रबंधन दी तैआरिएं दी समीक्षा करने आस्तै नमीं दिल्ली च

इक उच्च सतह दी बैठक दी शाह होरें अध्यक्षता कीती। उनें मुख्य च हाड़ दे खतरें गी घट्ट करने आस्तै व्यापक, कारगर ते दूरगानी नीति दी अमलावरी करने सरबंधी उपाएं दी समीक्षा कीती। शाह होरें निर्देश दित्ते जे मौसम विभाग आस्सेआ जारी बिजली चमकने दे पूर्वानुमानें गी आम लोकें तगर पजाने आस्तै एसएमएस, टीवी, एफएम, रेडियो ते होरने दुए माध्यमें दा इस्तेमाल कीता जाना लोड़चदा।

<><><><><><>

EAM-UAE

विदेश मंत्री डॉ. एस.जयशंकर होरें अबूधाबी च संयुक्त अरब अमीरात दे विदेश मंत्री शेख अब्दुल्ला बिन जायद बिन सुल्तान अल नाहयान हुंदे कन्नै मलाटी कीती। अपनी इक सोशल मीडिया पोस्ट च डॉ. जयशंकर होरें दस्सेआ जे दौनें मुखें बशकार बधदी रणनीतिक सांझेदारी पर गल्लबात होई। उनें क्षेत्रीय ते वैश्विक मुद्दें पर संयुक्त अरब अमीरात दे विदेश मंत्री हुंदे कन्नै गल्लबात दी सराहना कीती।

<><><><><><>

Super-30

पेट्रोनेट सुपर-30 गरीब ते लोड़मंद बच्चें लेई जेईई दे मतेयान दी तैआरी कराने दी इक सेवा ऐ जेहड़ी फौज दी व्हाइट नाइट कोर दे इलाके हेठ पौंदे लोकें लेई रखी गेदी ऐ। भारतीय फौज आस्सेआ रियासी च शुरू कीती गेदी इस सेवा दा फायदा ठोआंदे होई एहदे 18एं बच्चें ऐकती जेईई मेन्स पास कीता ऐ ते हुन एडवांस दी तैआरी करा करदे न। इस बारी दूर दरेड़े इलाकें दे रौहने आले 27 विद्यार्थिं जेईई मेन्स दा मतेयान दित्ता हा जिंदे चा 18एं बच्चें मेन्स पास कीता ते 12एं जेईई एडवांस बी कलीयर करी लैता। ओहदे बाद पैहली काउंसलिंग च 3 बच्चें गी आईआईटी च दाखला थोआ ते 16एं गी NIT च सीट थोई। फौज दी इस पैहल दा फायदा ठोआइयै केई बच्चें अपना भविक्ख संवारा करदे न।

<><><><><><>

LG Litchi Festival

उपराज्यपाल मनोज सिन्हा होरें बागवानी मैहकमा जम्मू आस्सेआ आयोजित लीची उनें आखेआ जे एह जतन सरकार दी करसानें दी भलाई बेह्तरी प्रति वचनबद्धता ऐ। उनें गलाया जे सरकार करसानें दे जीवन स्तर गी बेहतर बनाने लेई वचनबद्ध ऐ। उनें आखेआ जे राई-बाई दे पूरे पराते विकास सरबंधी प्रोग्राम जम्मू कश्मीर दी राई-बाई ते ओहदे सरबंधी सेक्टरें लेई कारी दा साबत होग। उनें आखेआ जे केइ सारे ऐसे प्रोजेक्ट चलाए जा'रदे न, जेहदे कन्नै करसानें दी आमदन च बाद्धा होई सकै। उनें सब्बने धड़ें गी किट्ठे रलियै जतन करने लेई गलाया।

<><><><><><>

Amarnath Yatra NDMA

राष्ट्रीय आपदा प्रबंधन प्राधिकरण आस्सेआ औंदी श्री अमरनाथ दी यात्रा लेई तैआरिं दे हिस्से दे तौर पर कल इक बैठक च टेबल टाप भ्यास दा सरिस्ता कीता गोआ। इस बैठक दी अध्यक्षता रटैर मेजर जनरल सुधीर बहल होरें कीती। जिनें बक्ख-बक्ख मैह्कमें ते अजेंसिं कोला यात्रा दरान कुसै बी कुदरती करोपी जां खतरे कन्नै निबड़ने लेई तैआरिं बारे तफसीली जानकारी हासल कीती। बैठक दी शुरूआत करदे होई रटैर लैफिटनेंट जनरल सैयद अता हसनैन होरें श्री अमरनाथे दी यात्रा दे राष्ट्रीय महत्व गी उजागर करदे होई कुसै बी करोपी जां फही अपात स्थिति दरान तुरत कारवाई दी जरूरतै पर जोर पाया। कश्मीर दे सेहत सेवाएं सरबंधी निदेशक डॉ. मुश्ताक अहमद राथर होरें चंदनवाड़ी आले बेस कैंप अस्पताल कोला लेइयै शेषनाग बेस कैंपअस्पताल तगर दौरा लाया ते उत्थें कीती जा'रदिं तैआरिं दा जायजा लैता। दौरे दरान उनें उत्थें एडवांस पार्टी दे तौरा पर भेजे गेदे सेहत कर्मिं कन्नै गल्लबात कीती ते उनेंगी आखेआ जे यात्रुएं दी सुविधा च कोई कमी नेई रौहनी लोड़चदी। ध्यानजोग ऐ जे ऐकती श्री अमरनाथ जी दी यात्रा 29 जून थमां दौनें रस्ते बालटाल ते पहलगाम थमां शुरू होआ'रदी ऐ।

<><><><><><>

Srinagar

श्रीनगर शैहर गी विश्व शिल्प परिषद नै अधिकारिक तौर पर "विश्व शिल्प शैहर" दे तौर पर मान्यता दित्ती ऐ। एह सम्मान शैहरे दे कारीगिरें दे समृद्ध ते टकोह्दे हुनर गी दर्शादा ऐ, जिसी दुनिया भरै च पंछान थ्होइ ऐ। उपराज्यपाल मनोज सिन्हा होरें इस शानदार उपलब्धि पर बधाई दिंदे होई इसी कारीगिरें दी सख्त मेहनत ते बेमिसाल प्रतिभा दा प्रमाण दस्सेआ। उनें आखेआ जे एह्दे कन्नै श्रीनगर दी समृद्ध, संस्कृति ते सगगोसार विरासत दा पता लगदा ऐ। उनें आखेआ जे सरकार कारीगिरें दे समर्थन लेई वचनबद्ध ऐ ते इस नमीं पंछान कन्नै उनें लोकें गी लाह थ्होग।

<><><><><><>

Sudhmahadev Mela

उधमपुर जिले दी चनैनी तैहसील च आयोजित 3 रोजा ऐतिहासक सुद्धमहादेव मेला सम्पन्न होई गोआ ऐ। मेले दरान तकरीबन 50 ज्हार श्रद्धालुएं सुद्धमहादेव मंदरै च मत्था टेकेआ। श्रद्धालुएं पाप नाशनी बौली च शनान बी कीता। मेले दरान लोक कलाकारें सनें स्कूली बच्चें बी अपनियां प्रस्तुतियां दित्तियां। तोआई रियासी जिले दे इगहार ग्रां च लग्गे दा त्रै रोजा बाबा अगहार जित्तो मेला बी सम्पन्न बी सम्पन्न होई गोआ। इस मेले दरान

खरी मती गिनतरी च श्रद्धालुएं बाबा जित्तो श्राईन च मत्था टेकेआ। इस मेले दा मुख आकर्षण दंगल रेआ जेहूदा सरिस्ता जेएंडके इंडियन स्टायल रैसलिंग एसोसियश आस्सेआ कीता गेआ।

<><><><><><>

T-20 World Cup

मर्दे दे आईसीसी टी-20 विश्व कप क्रिकेट मकाबले च अज्ज भारत अपने सुपर-8 च आस्ट्रेलिया खलाफ मैच खेडोग। एह मैच भारतीय समें मताबक रातीं 8 बजे थमां सेंट लूसिया ग्रास आइलेट दे डैरेन सैनी राष्ट्रीय क्रिकेट स्टेडियम च खेड्डेआ जाग। एह्दे थमां पैहले खेड्डे जाई चुके दे टी-20 च ऐसे 31 मैच च भारत नै 19 जित्ते जिसलै कि आस्ट्रेलिया नै शडे 11 मैचें च जित्त हासल कीती ते इक मैच दा कोई नतीजा नेई आया।

<><><><><><>